

اشعار بالعاميه

## برواز بدون صوره

محمد احمد اسماعيل  
(محمد الرائد)

الفهرسة  
الفهرسة أثناء النشر إعداد  
الهيئة العامة لدار الكتب والوثائق القومية  
إدارة الشئون الفنية

إسماعيل ، محمد أحمد

برواز بدون صورة

أشعاريا العامية

محمد أحمد إسماعيل [ محمد الرائد \_ مستعار ]

الطبعة الأولى

دار الإسلام للطباعة والنشر

٠٥٠ / ٢٢٦٦٢٢٠

٠١٢٣٦١٤٣٦٢

٨٠ ص ٢٩، سم

تدمك ٢ - ٢٦٥ - ٣٧٤ - ٩٧٧

رقم الإيداع: ٢٤٢٢ / ٢٠٠٧

١ - الشعر الشعبي المصري

أ - العنوان

٨١١،٠٨٤

## الاهداء

الى كل القراء الاعزاء  
الى كل المبدعين الأجلاء  
الى كل المتابعين للحركة الثقافية  
بجمهورية مصر العربية والوطن  
العربي

• اهديكم باقه اشعارى  
وزهور الهامى وافكارى  
ليصبح لكل انسان بستان  
يتأمله ويقطف منه ثماره  
كل ما لذ وطاب  
فأليكم ايها الاحباب  
(برواز بدون صورته)

---



## تَقْدِيم

نعلم ان حروف العربيه كثيره من الالف الى الياء وهذه الحروف منها ما هو شديد الاستقامه مثل الالف ومنها ما هو ملتوى كالياء فان كان الابداع الحقيقى هو النبع الذى لا ينضب ابداً امام الضامنين للفكر والادب والفن وهو الملاذ والذاد والنواد لاصحاب المسيرات الطويله فان هذا الديوان باستقامته واعتداله وتنوع مواضيعه ورقه كلماته وحروفه ومعانيه هو ابداع حقيقي إذاً فهو ملاذ وذاد ونواد .  
وان كان الشاعر قد اختار استقامه قصائده واعتدال مفرداته ودقه معانيها وحايده تماماً الحروف الملتويه والملتهبه فان هذا درب من دروب الشروع فى الانتحار وهو انتحار مشروع لدى الادباء دون غيرهم اذا ساروا على نفس النهج من الاعتدال والاستقامه وفتح الباب امام الراى الاخر حتى تُستكمل مسيره الصواب

وان كانت الحياه فى عالم الادب لها طقوس  
لايتقنها الا من يخلص لها قلبه ويفرغ لها فكره  
ويعطيها نفسه بكل ما فيها من احساسيس ولذا فان  
شاعرنا(محمد الرائد) قد اخلص وتفرغ واعطى  
واحس بكل مفردات قصائده الجديده التى تكون  
هيكلا لهذا العمل الذى خرج علينا اكثر نضوجاً  
ووعياً من سابقه وهم ديوانى ( شاهد عيان )  
وقطفه من كل لون (الى ان وصل بنا الى ديوانه  
الذى نحن بصددده (برواز بدون صوره) والذى  
يحتوى بين ضفتيه واحد وعشرون قصيده  
واغنيه يبدأ بقصيده شيشه , وينتهى بقصيده  
برواز بدون صوره التى هى عنوان الديوان  
ولهذا اخى القارئ الكريم تعالى بنا لننتعرف سوياً  
على بعضاً من محتويات هذا الاصدار ففى  
قصيده شيشه يتناول الشاعر جزءاً من معاناته  
الحياتيه ؟؟؟؟

علمتك لزمانك صنعه  
علشان يبقى لأسمك سمعه  
سهيتتى وطلعت بسرعه  
خدت حبيبتى تغنى عليها

ثم يطوف بنا حتى يصل الى قصيده ارمى  
حمولك على الله والتي تأخذنا الى بعض النصيح  
والارشاد  
والهم ان جه وزارك خلى صبرك نهارك  
وافتح للكل دارك الخير بكره تلاقيه  
وينتقل بنا سريعاً الى قصيده حاول تعود وفيها  
يصنع حواراً جاداً مع وجدانه ليتمكن من  
مجاراه الحياه  
ماتقولش اه ولا أى ولا اخ ولا احباب  
أوعى العتاب يصلبك على حب مش دايم  
ثم يأخذنا سريعاً الى صمت الكلام وفيها يعانق  
احلامه مع الحبيبه  
اكتب حكايه تسهر معاً وتقول لى قوم  
شوف فين حبيبك وارضى بنصيبك  
تصفى الغيوم  
ثم ينتقل بنا متخطياً بعض القصائد الى ان يصل  
الى قصيده اهلاً يا شده ويضرب بهذه القصيده  
كل معاناته الخاصه والعامه فى مقتل فيقول  
ياشده اهلاً بيكى عرفتيني الحبايب  
الوم اذاي عليكى بعد ما شوفت العجايب

ثم يختتم تجربته الابدعيه بقصيدة برواز؛ والتي  
يجسد فيها الحاضر الأكثر تمكناً في ابدعاته القادمة  
اصل الوشوش الوان والرك ع الأوزان  
ممکن تكون انسان لآكن مالکش جناح  
لذا فإنه ابدع وتآلق وأصبح عضواً بارزاً  
وشاعر أقديرأ

والله ولى التوفيق  
م/ عادل محمد عامر



## شيشه

ما انتاش فاكر  
انا اللي علمتك تتكلم  
انا خليتك تبقي معلم  
وعزمتك  
علي قهوه وشيشه  
علي سهوه  
سممت العيشه  
لما الشيشه  
طفحت فيك  
علمتك ع الخلق تسلم  
وتقدم للكل تحيه  
حبه بحبه

شويه شويه  
شوفت ايديك  
بتفتش فيه  
وبتاخذ  
اللي ماهوش ليك  
والشيشه  
وصلت لعينيك  
علمتك  
تضحك للناس  
وتحسسهم  
انك شاري  
وبتسقيهم  
م الاحساس  
وانا مش فاهم  
أيه مداري  
كل شويه

اسمع اخبار  
انك صاحبي  
وانك جاري  
وتمللي الهم  
عليك جاري  
واما ماشيتك  
قمت لقيتك  
نسيت العيشه  
لما الشيشه  
ضربت فيك  
علمتك  
لزمانك صنعته  
علشان يبغي  
لاسمك سمعه  
سهنتي وطلعت بسرعه  
خدت حبيبتي تغني عليها

وعشان فيها الحب بحق  
قالت لا  
عقلك طق وروحت نفیشه  
لما الفیشه سكنت فيك  
دخلتك دارى وشبعتك  
وداد يتك وأد يتك خيرى  
خنت العهد ورحت لغيرى  
تتكر عيشي وتتكر ملحي  
وف جرحي تنسي العنوان  
علمتك كل الالوان  
حتي عياقتك وف هندامك  
كنت امامك  
حتى فى ساعة واجب اخوك  
روحت لغيرى ترحب بيهم  
وكانك ما بتعرفنيش  
وانا شايلك

طول عمرى وصاينك  
ولا فيش  
يوم قصرت معاك  
ليه وياك دايمًا تتعبنى  
وتملئ بالغدر غالبنى  
مهما سهام  
الهجر تصيبنى  
مش هاقسى  
ولا هادعى عليك  
وحسيبك لله  
وراح اصبر  
وهأجر  
وحاسيب لك وطنى  
قبل ما شرك  
يوم يخبطنى  
ياللى الخير

ما بيظمر فيك  
ياللي الحقد  
في قلبك بات  
ليل ونهار  
بتخر آهات  
حبك مات  
ودك مات  
واتحنجالت  
تلات نطات  
جوه السوق  
بره السوق  
والبزنس  
نى ومسلوق  
خليت  
طعم الدنيا مرار  
العب بره

يا ابو الشطار  
العجب بره  
ماشى ياسيدى  
هابعت لك  
كل التجار  
لاكن ابدا  
مش راح ابيعك  
وهادارى  
ع الناس مواضيعك  
مهما تبيعنى  
ومهما تخايل  
وتخبى  
المعدول والمايل  
المسأله  
مش حمل جمايل  
قلبي انا صافى

وقلبك شايل  
وان فكرت  
انك تعزمنى  
فى يوم على شيشه  
هانسي العيشه  
واقول لك لا  
وحايبقى وياى الحق



## قارب نجاه

يا للي  
عشقك من زمان  
ورسمت  
صورتك ف السما  
جنب القمر  
طال السهر ويا النجوم  
وانتي لا حس ولا خبر  
كل ليله اسهر عشانك  
والهوا يشد الستار  
كل يوم  
اصحي علي ضي النهار  
وانتي الشموس

وانتي النهار  
وانتي البياض  
وانتي السمار  
والدنيا  
شافت ضحكك  
مشيت وراكي  
ليل نهار  
يا ام الجمال المنتشي  
وف كل لحظه توشوشي  
قلبي وروحي ومهجتي  
يابهجتي  
النجمه فوق  
شافت عنيني  
قالت لي فوق  
واطلع لفوق  
فوق السحاب

وارسم  
علي وش السما  
وشم الهنا  
من غير عتاب  
رجعت تاني  
رسمت لك  
صوره  
بطول الاغتراب  
وفتحت باب الدندنه  
جايز  
تروقي وتسمعي  
لحني  
اللي مشتاق يسمعك  
يمكن غنائي يرجعك  
وتعودي  
للحزن العليل

اللي ف عز الليل وحيد  
مشتاق  
اضمك واحضنك  
والقاكي عيد  
مستني  
ضيك من جديد  
يفتح عيوني للحياه  
والقاكي  
في عز الهموم  
قارب نجاه

## مش مسامحك

لا يا عم والـف لا  
اني اسامحك  
ولا اصالحك  
وانسي يوم  
ما قسيت عليّ  
سبتني  
وما سألت فيّ  
بعثني  
وجرحـت قلبي  
حتى ما سألتش عليّ  
جاي تاني  
تقول سماح

مش هاسامحك  
مش هاصالحك  
مهما جيت  
توصف لي جزحك  
ان فرحك تاه خلاص  
لا خلاص  
م الغياب مابقتش عايز  
اي شئ يربطني بيبك  
والجفا خلى الشفايف  
تنسى اي كلام عليك  
لا ياسيدي روح بعيد  
قلبي متهنى وسعيد  
واني اسامحك من جديد  
روحي  
هتقول مستحيل  
مستحيل انك تعود

تبدر  
الخوف فى الوجود  
يا للي  
ما حفظتش عهدى  
ودى ليك مابقاش يفيد  
عيش وحيد  
ولا دور عن طبيب  
او حبيب تسقيه مرارك  
واللى يختارك ياويله  
السهر هيصحى ليله  
والعذاب حواليه هيكبر  
لما يلقي الرد جرحك  
مش مسامحك

## اصل الحكايه

م البدايه . . . للنهايه  
م النهايه . . . للبدايه  
اننا ملناش مصير  
والمشاكل والمهازل  
غرقنا ف قلب بير  
الصغير مش مطاوع  
والكبير غدار ملاوع  
بأختصار الكل بايع  
والشيطان هو الامير  
والامور مش حلوه بينا  
والمحن مش باعده عنا



والعواصف بتقابلنا  
واحنا مش لا قيين صباح  
الطمع ضيع هييتنا  
والخصام سوء سيرتنا  
والخراب عشش فى بيتنا  
والقلق جوانا باض  
كله باصص للزعامه  
كله عاشق الاعتراض  
حلمنا اصبح سراب  
والامل عجز وشاب  
حتى باب الفرع صدا  
والهنا قفل الكتاب  
نورنا غاب والنوم جفانا  
من غيومنا ومن بلانا  
امتى هنزيح الغمامه  
والوطن يرجع شباب

## ارمي حمولك على الله

سلم امرك لربك  
وارمي حمولك عليه  
واوهب للحب قلبك  
هتلاقي الدنيا فيه  
والهم ان جه وزارك  
خلي صبرك نهارك  
وافتح لكل دارك  
الخير بكره تلاقيه  
امشي ف الدنيا سايح  
واقبل كل النصايح  
واوعي تهوي الفضايح  
والعالي تهد فيه

خليك ع الكل غالي  
تفضل علي طول ملالي  
لو يوم تطلب وصالي  
اخلاصي تحس بيه  
اسجد لله يصونك  
ويخلي الستر كونك  
وأدي من حر مالك  
ولا تعبد شي الجنيه  
حاول تعمل حسابك  
قبل ما تقفل كتابك  
وتلاقي هناك عذابك  
بيقول مرحب يا بيه  
علي ايه تشخط وتنطر  
والخالق فوقنا اكبر  
وطاوعني ان كنت تقدر  
ارمي حمولك عليه

## يارب انت المعين

يارب ليه الناس  
ظلماني باستمرار  
حتي اعز الحبايب  
ماليين القلب نار  
في الشده بيسبونني  
واندهم ما يغيتوني  
ويوماتي يهجروني  
وبيسقوني المرار  
أضحك همي يقاسمني  
والياس يهد روعي  
وتملي الخوف قاسمني  
ولياتي الغدر صاحي

موالي مالوش نهايه  
وغنائى ناي حزين  
ولاشوفتش يوم حكايه  
من غير شك وانين  
أنا فين والحب فين  
والود ناسيني ليه  
وحياه المشتاقين  
مش حلوه ولا ايه  
يارب انت المعين  
داوي جراح السنين  
وانا راضي يارب راضي  
مهما تكون القواضي  
والحاضر واللى غايب  
مالهمشي معاي ماضي  
دا الخير في القلب طارح  
وبحافظ ع الجميل

والود تملي سارح  
ولا كنتش يوم بخيل  
ويارب انت اللى قادر  
تعطف علي قلب صابر  
وان كان البخت مايل  
يارب انت المعين

## وحدووه

الاوله بسم الله  
بدأ العدد واحد  
ما تصلوا  
ع المصطفي  
وتوحدوا الواحد  
قلبي وقع واختفي  
صليت رجع فيه  
وعينيه حلفت يمين  
ماتبص غير ليه  
والمسؤوليه جبل

ومكتفه ايديه  
والهم طول عليه  
والسبب واحد  
جاحد لكل الحبايب  
والآسى لونه  
وحياته دايكه  
ودايما ماشي بجنونه..  
شاييل ظنونه  
في كل طريق وبيناهد  
حيرني لما اشتكي  
من كل جنس ولون  
خلاني اطواع هواه  
من غير ودان وعيون  
اتاري طبعه كده  
جوه الجفا مدفون  
شارب جالون مكر



ودايما للوفا جاحد  
اتنين هجين الاصاله  
فك يازناتي  
سيبك من المنتهي  
وانظر علي الاتي  
واغنم ساعاتك  
وسيبك من ملذاتي  
وامشي علي ذكرياتي  
ذي الالف قايم  
متعيشي....نايم  
وتصحي تبص للعالي  
واحلم بانك مثالي  
وعالي تكوينك  
وارفع جبينك لفوق  
وانسي الآهات هتفوق  
وتلاقى فى السوق

حبايب يشترو وداك  
ماتسيبش حقاك  
ولو وصلت لآخر حد  
وان يوم عاداك حد  
خلي الصبر من كوماك  
متلومشي علي دنيتك  
ولاتشتكي يومك :

## اجمل كدبه

يااجمل  
كدبه في حياتي  
وصبحت لحن جوائ  
عشقتك والهوا شالني  
ما بين حدوته وحكايه  
وف الراحه وف الجايه  
غنائ ملو اوقاتي  
عزفتك سيكا وبياتي  
رسمت حياتي علشانك  
قصور عاليه  
هجرتها

وسبتي الحد والغربان  
بتر عق  
فوق شواشيها  
وعصافير الهناخافت  
من الهجران لايشويها  
عرفت الحب علي ايدك  
ويوم عيدك فتحت كتاب  
وداب الحبر في حروفك  
وبين..ورقي وبين قلقي  
لمحت عزول  
وناس بتقول  
مالكشي نصيب  
ماتحلمشي  
عشان تقدر في يوم تمشي  
ما بين الخلق  
وتدور علي عاشق

يكون صادق  
ويخلص لك ويوفي لك  
وليل ونهار يدفي لك  
حياتك بالصفاء والود  
يا أجمل كدبه  
في حياتي  
مانيش عايز  
جواب ولا رد

## حاول تعود

يا عقلي فوق  
وبلاش تسوق فيها  
ولايمها واطلع  
من شقوق الطيش  
متشد نيش يم الغروب  
واصبح يادوب برواز  
والدم يملا القزاز  
والحرکه تتعطل  
حاول تبطل تخبط  
ع اللي ما بيسألش  
متقولش اه ولا أي  
ولا اخ ولا احباب

وأوعى العتاب يصابك  
علي حب مش دايم  
حاول تعدي الهزاييم  
مهما كان السد  
والكلمه لو جد  
يبقي الاحتمال وارد

## دنیا عجیبہ

دنیا عجیبہ  
وعیشہ اونطہ  
دایما شایلہ  
الہم ف شنتطہ  
ومعیہ  
الفقر ف مخلہ  
خارجہ وداخلہ  
تمر مط فیہ  
الایام  
بتذود نوحی  
والاوام  
بتقجر روحی  
وجروحي



بتشد جروحي  
وبراحي  
بيضيقي حوالي  
ولا فيش حد  
بيبيكي عليه  
حتي ف عزالنوم محروم  
والاحلام  
بتمص في دمي  
ساعه بساعه  
ويوم ورا يوم  
والكوابيس  
من غير ما تسمي  
ليل ونهار  
بتتط علي  
متكفيه جميع احوالي  
حتي خيالي

بيلعب بيه  
كل شويه  
ياخدني لتو هه  
القي اذاها  
بيشتي على  
يامعديه همي اتلمي  
امي وابويا  
جابوني حلال  
واتربيت  
علي ستر الحال  
حبي وودي  
واصلي العالي  
مصل ينجي  
من الاهوال  
دين وكتاب  
وعقيده وسنه

لجل الجنه  
تكون لي ختام  
هاتي يادنيا  
غرام اوجاعك  
ضايقيني  
وانا صبري يساعك  
كلك كده  
بجميع اوجاعك  
مالكيش لازمه  
وسطر زوال

## يادنيا مالك

يادنيا مالك  
شايه المهالك  
الحرب عمك  
والقتل خالك  
والويل ف ايدك  
قطع وريدك  
وتملي سيدك  
دايما يزيدك  
غدر وخيانه  
ولافيش حصانه  
لما الحضانه  
ولدت حزانه

مالهمش منوي  
ولاحتي فتوي  
والشكوي دايم  
سوده وغويطه  
وامور عبيطه  
فوق الخريطه  
توصل لعركه  
وتهد حيطه  
ونقول بسيطه  
يا عم سيبك  
دا العمر واحد  
والرب واحد  
خليك ف حالك  
وادفن ف بالك  
اصل المهالك  
لو يوم تطولك

هتقص ديلك  
وتهد حيلك  
وتسد بابك  
صبح وعشيه  
عدويه غني  
يادنيا زحمه  
ولا عادش نابت  
ولا عادش لحمه  
والرحمه تاهت  
جوه الموالد  
والد يقسي  
مولود بينسي  
والهلس حاطط  
فى الشعر بنسه  
والست حوا  
صبحت فتوه

ولا عادش بره  
ولا عادش جوه  
ولا عادش فينا  
لحظه مروه  
والقوه نامت  
جوه المصحه  
والصحه شربت  
نار الفيحرا  
وهيجرا ايه  
يادنيا تاني  
ادمان واكلنا  
ولا فيش امانى  
وميزاني تلم  
من طول. ما سلم  
لحاجات تخلي  
الحجر ييلم

سلم ياربي  
الخوف لعبي  
وف عبي غمه  
خايف تفرقع  
تقلع جدوري  
وتهد صوري  
وان كان ضروري  
اكسب زماني  
هاقطع لساني  
واقفل وداني  
واسكن في تربه  
طول الزمان



## امیره

ولانی  
بحبك یا امیره ..  
حبیبك  
ولا جبتش سیره  
وداریت  
الأشواق والحریرہ  
ورسمت  
الأحلام ف جزیرہ  
ولانی  
بحبك یا امیره  
وبنیت لك  
جوائ قصور

حواليها  
جناين وبحور  
بيدور  
العشاق حواليها  
وانا بعشق  
ف عينيكي النور  
ياأميره  
ياجنه أحلامي  
القلب  
وهبتوك نامي  
أحلامي الصافيه  
ف شوق ليكي  
مشتاق لك  
مدي لي ايد يكي  
ولأني بحبك ياأميره  
القمر السهران يسمعني

ح يقولك  
شاعر بيغني  
ف الهوى والشوق  
سهمك صابه  
ولا قادر يهرب بعذابه  
ولأنك جنه احبابه  
سماكي  
ف احلامه أميره  
ولأنني بحبك يا أميره  
حبيبتك  
ولا جبتش سيره  
وداريت  
الاشواق والحيره  
ورسمت  
الاحلام ف جزيره  
ده لأنى بحبك يا أميره

## صمت الكلام

يا شمس غيبي  
راح فين حبيبي  
وسابني  
للليل والهموم  
اسهر وانا دي  
دمعي وفؤادي  
بين النجوم  
اكتب حكايه  
تسهر معاً  
وتقولي قوم  
شوف فين حبيبيك  
وأرضي بنصبيك

تصفي الغيوم  
ياسمش غيبي  
راح فين حبيبي  
وساييني  
للليل والهموم  
يا عيون حبيبي  
لو يوم تغبي  
يجافيني نومي  
واشوف ملامه  
في عيون عزولي  
زي الغيوم  
قالو علينا  
بعنا ونسينا  
وكفايه لوم  
يا شمس غيبي  
راح فين حبيبي

## انت اللي اخترت

سلمت عليهم ونسنتي  
وانافكر مش واخد بالك  
وشايفني معاهم ولا جيتني  
واتعجب ايه اللي جرالك  
طب لما عنيك جت ف عنيه  
لاتسلم ولا تسأل فيه  
كان قصدك ايه ما تفهمني  
يا ساحرني بحسبك ودلالك  
كل اللي قالوك عني كلام  
ياما قالوا ياروحي كثير عنك

لا عاتبتك مره بأي ملام  
ولا يوم فكرت از عل منك  
ليه تصدق كل اللي اتقال  
وتشمت فينا العزال  
ونضيع اجمل احلام  
وانا ما ستغنناش ابدا عنك  
ليه نعمل قيمه لحسادنا  
ووشوشهم زايغه وكدابيه  
يا هناهم لو تم فراقنا  
وغرا منا يفوت زي سحابه  
وانا اسف لو رحت معاهم  
ومشيت يا حبيبي علي هواهم  
يبقي انت اللي اخترت بعادنا  
وحتند م علشان احنا طيابه

## معني الحب

اللي ف قلبك دا مش حب  
اللي ف قلبك ده شيء ثاني  
انا عارف الوان الحب  
همس ولمس وشوق واماني  
دا اللي يحب يصون العهد  
ولا يقطعش حبال الود  
وان معرفتش معني الحب  
يبقي احسنلك روح وانساني  
اللي ف قلبك دا مش حب  
اللي ف قلبك اسمه خداع  
حاسب قلبك لو يوم حب  
مش حيلاقى غير اوجاع



ليه مثلت عليه الدور  
ليه الا قيك دايمًا مغرور  
ليه تجرحني من غير ذنب  
قلب المخلص عمره ما باع  
دا اللي يحب يصون العهد  
ولا يقطعش حبال الود  
وان معرفتش معني الحب  
يبقي احسنالك روح وانساني

## احلام

أما ان الاوان  
لانشاء محكمه شرعيه  
بعيده عن الحياه الزوجيه  
لحقوق الانسان  
لحمائه الحب من الغدر  
والهجر والامان  
الا ترين ما بداخلي  
من احلام  
آن الاوان  
أن اغلق سرداب الصمت  
وان افتح ابواب الكلام

## الحلم الاول

وحياه الحب  
اللي واخذني  
مش قادر  
ابدا يسعدني  
لا ها غمض  
عيني من المغرب  
واحلم لك  
احلام بتكرب  
واتقرب  
من بنت الجان  
ولا جيب لك  
لولي ومرجان

ولا هاشغل  
بيكي التفكير  
جوه الحلم  
السرف بير  
خير  
اللهم اجعله خير

## الحلم الثاني

والحلم الثاني اللي سقاني  
جوه منامي عصير الفرحة  
كوشه وزفه وبيشه وطرحه  
وانتي في وسط الفرحة اميره  
في ايديكي صوره وفنجان  
بتشوفي بختك ونصيبك  
مستنيه سيد العرسان  
قمت صحيت  
على طول فرحان

## والحلم الثالث

الحلم الثالث  
يا حبيبتي  
وانا واقف  
علي شط البحر  
شففت عنيكي  
ف قلب الميه  
شففتك  
تحت الميه عروسه  
اجمل من اجمل جنيه  
طلعت لي  
وقالت لي يا غالي  
شايلك اجمل تقدير

## صح النوم

اصحي يا عم  
قول يامعين  
مين بينادي  
يا ابني اتحرك  
شمسك طلعت  
صباحك زاهي  
قلت الاهي  
يكون بصحيح  
ياما سمعت  
كثير تصاريح  
لاكن

كم الريح نطورها  
ع المجاريح  
يا ابني اتململ  
واتامل  
سلمك وسلامك  
نور اسلامك  
لم الكل  
قلت دا فل  
يعني بجد  
الكل اتوحد  
مش معقول  
ممکن  
نرجع تاني خيول  
نرمح  
جوه ساحات العزه  
ننسي اللحمه



وننسي المزه  
ونهز  
الفاجر والعاصي  
ونواصي  
الأيام تطهر  
م الشياطين  
فز اتحرك  
شيل الزفت  
ما انت يا خايب  
ياما وقفت  
ف وسط الطين  
قمت صحيت  
م نومي لقيت  
جنب البيت  
صاروخين واقعين

## مركب قلبي

بعد ما هز الحب قلبك  
هز قلبي  
روحي سبقت خطوتي  
والغرام دابر معاً  
والحنين جوائ صاحي  
والهوى شایل صباحي  
والاماني سكتي  
افتحي قلبك شويه  
قلبي بيخبط عليك  
وف عينيكي دنيتي  
خلي شباكك موارب  
لجل نسمة شوقي تدخل

تحضنك وتحس بيكي  
افتحي لبختك ايد يكي  
واقطفي زهر الحنين  
والحنان خليه معاكي  
لما تخضر السنين  
سمي علي قلبك وقلبي  
وارقي حبك م العوازل  
رقي علي حبك وحي  
تلتقي الاخلاص مغازل  
غزلها يكسيكي فرحه  
متلاقيش ولا كلمه جارحه  
والمسامحه والمصارحه  
هما احلي كلمتين  
لما تخضر السنين

## يا لا نعیش

ابكي عليك ولا ابكي عليه  
ولا ابكي علي دنيا رديه  
دمع عينيك مع دمع عنيه  
نازلين سح علي الخدين  
ليه البخت معانا معاند  
ليه الزهر علينا يدور  
والافراح مش لاقيه مساند  
وهنا مش لاقى بدور  
مش لا قيين ولا بر يساعنا  
وتملي قلوبنا بتوجعنا  
مهما مشينا و مهما رجعنا  
نوصل ثاني لنفس الدور

دايما بنقاسي وبنعاني  
مش لاقبين لصفانا معاني  
وحناني مش هوه حناني  
وزمانك زي الد بور  
واللهفه علي طول شايلانا  
ولقانا مشتاق للقانا  
وهوانا عواصف راميانا  
علي شط الحلم المسحور  
قوم يا حبيبي نقيد النور  
نصبر صبر مالوهش مراسي  
وندور علي كام عصفور  
بين احساسي وبين احساسك  
وتكون شمعي واكون وناسك  
وندور علي دنيا هنيه  
لا ابكي عليك ولا تبكي عليه

## أهلاً يا شدة

يا شدة أهلاً بيكي  
عرفتيني الحبايب  
الوم ازاي عليكى  
بعد ما شفت العجايب  
اللى كانوا قريبين  
واللى كانوا حنينين  
واللى فرحهم عذابى  
خلو زهر العمر شايب  
كام سنه واحنا هنا  
عاشين ف جنبه م الهنا  
الكلام طالع غنا  
قلت مين زى أنا

كنت فاكرهم حبايب  
وف هواهم قلبى دايب  
الحبايب جرحونى  
نسيوا حتى مين انا  
مش ح الوم  
ع اللى فاتونى  
ف لحظه قلبى فيها كان  
كان فاكرهم حيواسونى  
بنظره او كلمة حنان  
الغريب القاه حبيب  
والحبيب يصبح غريب  
افتكر حكمه اتقالت لى  
فى الليالى النور بيان

## يالحن فى غنايا

بلادى بلادى  
يالحن فى غناى  
يا مشهد ميلادى  
يا مرتع صباى  
وصفحه كتابى  
وبهجه شبابى  
ولمه صحابى  
وسعدى وهناى  
هصونك يوماتى  
واصونك ليلاتى  
واقدم حياتى  
وهاحمى حماى



خضوعك خضوعي  
دموعك دموعي  
شموك شموعي  
وامنك مناي  
بحب ان اشوفك  
واذوق ظروفيك  
وقلقك وخوفك  
يزود آساي  
سمارك سماري  
وحبك شعاري  
ياوحي ابتكاري  
ووشم الصبايا  
اصاله جدودك  
وكرمك وجودك  
وقصه صمودك  
قريتها بعنايه

تاريخك مناره  
وفنك مهاره  
وتحكي الحضاره  
فصول الروايه  
هاعيشك زمانى  
والفك موانى  
واحقق امانى  
وحاسكن سرايا  
ياصوت السواقى  
بتسقى الشراقى  
ووز العراقى  
بيسرح ورأى  
رويتك بايدى  
وهاجمع حصيدى  
وهارقص فى عيدى  
لحد النهايه

غيطانك نخيلك  
بتحلف بنيالك  
وقلبك د ليالك  
ياست الصبايا  
يالوزه واديننا  
وقطنك كاسينا  
وقصبك راوينا  
وقمحك غدايا  
هازفك وابوسك  
واولع فانوسك  
عروسه وعريسك  
جايب لك هدايا  
ياست الصبايا

## برواز

برواز بدون صوره  
فوق الحيطان مرتاح  
لا ببيكي م الاحزان  
ولا غنى ف الافراح  
شايف ولا بينطقشى  
ما هو عنده ما بتفرقشى  
ومالهوشى ف المعدول  
ولا حتى ف المايل  
ما هو اصله مش طایل  
يختار بايدہ وش  
اصل الوشوش الوان  
والرك ع الاوزان  
ممکن تكون انسان  
لاكن مالکش جناح



### تعريف بالشاعر

محمد احمد اسماعيل احمد الشهرة (محمد الرند )

مواليد الاسماعيليه ١٩٦١

مدير عام جريده الخط الساخن بمدن القناه  
والشرقيه

عضو مجلس محلى الاسماعيليه

صدر له من قبل ديوانى/شاهد عيان /وقطفه من  
كل لون /على نفقته الخاصه

رئيس رابطه الزجالين وكتاب الاغانى فرع  
الاسماعيليه

يعتبر ممارس جيد ونشط فى المجال الصحفى  
والادبى

نشر له العديد القصائد والاغانى فى الصحف  
والمجلات الرسميه

اذيعت له بعض الاعمال باذاعه وتليفزيون القناه

عضو عامل بنادى ادب قصر ثقافه الاسماعيليه

يدير الندوه الاسبويه لرابطة الزجالين

وكتاب الاغانى بنادى الاشراف يوم الاثنين من  
كل اسبوع

## الفهرس

٩	شيشه
١٧	قارب نجاه
٢١	مش مسامحك
٢٤	اصل الحكايه
٢٦	ارمى حمولك
٢٨	يا رب انت المعين
٣١	وحدوه
٣٥	اجمل كدبه
٣٨	حاول تعود
٤٠	دنيا عجيبه
٤٤	يادنيا مالك
٤٩	اميره
٥٢	صمت الكلام
٥٤	انت اللي اخترت
٥٦	معنى الحب
٥٨	احلام
٦٣	صح النوم
٦٦	مركب قلبي
٦٨	يلا نعيش
٧٠	اهلا يا شدة
٧٢	يا لحن ف غنائ
٧٦	برواز

للتواصل مع الشاعر

٠١٢٤٢١١٣٤٦

٠٦٤٣٩١٢٢٧٩

٠١٠٤٢١١٣٤٦

٠٦٤٣٣٣٣٨٧٦

٠١٢٨٨٧٣٦٠٧